

經世大典 永樂大典卷一萬九千四百十六

站赤一

站赤者國朝驛傳之名也凡站舊書作驛陸則以馬以牛或以驢或以引車水則以舟其應給驛者皆以璽書而軍務大事之急者又以金字圓符為信銀字者次之其符信皆天府掌之其出給在外者皆國人之為官長者主之他官不得與也馬數多寡視官品高下公事大小止則有館舍頓則有供帳饑渴則有飲食事畢則以符信歸諸所受之府不敢三日稽也祖宗之法至今守之其官為驛令小者皆設提領又置脫脫禾孫於都會關要之地以詰其姦